

INKESTA POLITIKOA. Herritarren borondatea jasotzeko xedea dauka

Nafarroako hauteskunde inkestan sartzea eskatu dute Aralar eta Batzarrek

Legebiltzarreko presidentearentzat, «oso zaila» da eskaera betetzea



Aralarreko kide Josu Gulina, Patxi Zabaleta eta Sagrario Aleman, prentsaurreko batean.

Kristina Berasain | IRUÑEA

Nafarrek alderdi politikoen inguruan duten iritzia jasotzeko irailean egingen den inkestan, Aralar eta Batzarre «bertze aukera politiko gisara» azaltzeko eskatu dute bi taldeetako ordezkariak. Josu Gulinak Aralar taldeko kideak, eta Milagros Rubiok, Batzarreko legebiltzarkideak, eskaera jasotzen duten idazki bana aurkeztu zuten atzo Nafarroako Legebiltzarrean.

Ezker Abertzalearen baitan izandako prozesuaren ondorioz sortutako hiru indar politikoak —Batasuna, Aralar eta Batzarre— inkesta horretan agertzeak duen garrantzia azpimarratu zuten bi aldeetako ordezkariak. «Dagoeneko EH ez delako existitzen», gaineratu zuten.

Josu Gulinaren hitzetan, «nafar guztien borondate politikoa bildu nahi bada, behintzat, nahitaezkoa da alderdi guztiak inkestan ordezkatuak egotea». Milagros Rubiorentzat, aldiz, herrialdeko politikak azken hilabeteotan izan duen bilakaera islatu behar da galdeketa; «horrela ez bada, emaitzak errealitatearen alde bateko ikuspegi faltsua baino ez dira izanen».

Eskaera gauzatzea «oso zaila» ikusten du Castejonek

Nafarroako Legebiltzarreko presidente Jose Luis Castejo-

BATASUNA

Pueio parlamentari izendatzeko prozesua

Marine Pueiok, Iruñeko Udaleko EHko zinegotzi ohiak, ordezkatu du Pablo Muñoz Nafarroako Legebiltzarrean. Aralar Batasunatik bereizi ostean eman zuen dimisioa Muñozek. Batasuna taldeak atzo aurkeztu zuen Pueio izendatzeko idazkia, eta datorren astean hartuko du bere kargua.

PATXI ZABALETA

Aralar taldeko kidea

«Itaunketan ezin dira murriztu herritarrei eskaintzen zaizkien aukera politikoak»

MILAGROS RUBIO

Batzarre taldeko legebiltzarkidea

«Herrialdeko politikak azken hilabeteotan izan duen bilakaera islatu behar da inkestan»

nek, bi aldeen eskaerak ezagutu eta berehala, horiek gauzatzea «oso zaila» dela adierazi zuen, berteak bertze, «inkesta dagoeneko agindua dagoelako».

Castejonen aburuz, «bere garaian argi eta garbi zehaztu zen itaunketa azken hauteskundeetan aurkeztu ziren alderdi politikoentzat zela, Legebiltzarrean eratu ziren alderdientzat, hain zuzen ere».

Aralar ildoko kide Patxi Zabaletak atzo Euskalherria Irratian esan zuenez, ezin dira murriztu herritarrei eskaintzen zaizkien aukerak, «guztion diruarekin egin behar den inkesta delako». Ildo horretan, nafar herritarren boto asmoa egiaekin bat etor dadin nahi bada, Aralarrekin ere kontatu behar dela azpimarratu zuen.

Aralar eta Batzarre datoen hauteskundeetara elkarrekin aurkezteko Milagros Rubiosek joan den astean agertu zuen asmoaren aurrean, Zabaletak Aralarrek «Batasunari aitzintasuna» emanen diola aurreratu zuen. Halaber, duela hilabete Batasunari «ideia trukaketa izateko proposamena» luzatu zietela adierazi zuen Zabaletak, eta oraindik erantzuna ez dutela jaso erantsi zuen.

Egungo Nafarroako egoera ezagutzeko galdeketa datorren irailean egingen du CIES SL enpresak, eta azaroaren erdialdean emanen ditu ezagutzera inkestaren emaitzak, Legebiltzarreko alderdi guztien artean. Nafarroako Legebiltzarrak martxoaren 12an egin bileran adostu zuen inkesta egitea.

PP-PSE. Popularrek ez dute atzera egin

Sozialistek uko egin diote PPrekin zerrenda bateratuak aurkezteari

Erredakzioa | DONOSTIA

Gemma Zabaleta PSE-EEko idazkari instituzionalak adierazi du ez dutela PPrekin zerrenda bateraturik aurkeztuko. Carlos Iturgaitzek herenegun proposatu zion PSEri zerrendak osatzeko zailtasunak dituzten herrietan PPrekin batera aurkezte. Rodolfo Ares PSE-EEko Batzorde Eragileko koordinatzaileak herenegun bertan proposamena baztertu zuen, eta atzo berdin egin zuen Zabaletak, PSE PPren ideologiatik urrun dagoela argudiatuz.

Zerrenda bateratuak aurkezteak «hiritarren nahasmena areagotu besterik» ez lukeela egingo uste du Zabaletak, eta alderdiek koalizio-tan soilik joan behar dutela batera.

PSOEko idazkari Jose Blancok ere PPren proposamena ez du egokitzen jo, eta egin behar dena «hauteskundeetara inongo arriskurik gabe aurkezte» ahalbidetzea dela adierazi du.

PPko idazkari nagusi Javier Arenasek atzo adierazi zuen PPren helburua, PSOEren laguntzarik gabe aurkezte dela, baina ez duela baz-

tertzen PSOErekin zerrenda bateratuak osatzeko. PPk eta PSOEkin proiektu, politiko ezberdinak izanagatik, «balore eta printzipio komunak» dituztela dio Arenasek.

«Konstituzioaren, Estatu-tuaren eta askatasunaren defentsa» aldarritzat du PPk, eta ETari «jakinarazi» nahi diote PPk edo PSE-EEK agintzen duten udaletan ez dutela «xantaiarik» onartuko.

EAEko PPko bozeramaile Leopoldo Barrerak ere uste du aproposa litzatekeela zerrenda bateratuak aurkezte, eta EAJ eta EAri ere haietarako gonbitea luzaten die. Alderdiok «ekimen honekin bat ez egiteko arrazoirik» ez dagoela esan zuen Barredak, «horiek ere zenbait udaletako zerrendak osatzeko zailtasunak dituztelako».

Zerrenda horien xedea Batasuna alkatetza duen udaletako agintetzatik kanporatzea litzateke, batez ere, alderdi horrek gutxiengoan agintzen duen udalerrietan.

Zenbait zinegotzik dimitu beharra «askatasunik eta demokraziarik ezaren» adierazgarri da, Barredaren ustez: «Bat eginez, askatasun guneak lortu nahi ditugu».

UPN-PSN. Zinegotzien dimisioak hizpide

PSNk Alberto Catalanen adierazpenak gogor gaitzetsi ditu

Kristina Berasain | IRUÑEA

UPNko idazkari Alberto Catalanek herenegun egin zituen adierazpenak «guztiz gaitzesten» dituela adierazi zuen atzo Nafarroako alderdi sozialistak, prentsa ohar baten bidez. Catalanek esandakoak «manipulazio baldar bat baino ez dira», PSNren iritziz.

Astelehenean dimititu zuten Irurtzungo UPNko zinegotziei haien erabakia «berriz pentsatu eta karguan segitzeko» eskatu zien Juan Jose Lizarbe PSNko idazkariak. Alderdi erregionalistaren ustez, adierazpenok «arinkeria hutsa» dira, eta alderdikierarik ez egitea eskatu zion PSNri. Azkenik, «egoeraren erabilpen politikoak»

egitea deitoratu zuen. PSNk eta UPNk Estatu ituna sinatzean «alderdikeria» ez egitea adostu zutela gogorarazi zien Catalanek sozialistek.

UPNko zinegotzien dimisioak direla eta, Batasunak eta NEB-IUK prentsa ohar bana zabaldu dute. Batasunarentzat, dimisioak «arazo politiko baten ondorio dira». IUK, aldiz, egoera «oso larritzat» jo zuen.

Atarrabian osoko bilkura

Bien bitartean, atzo iluntzean Atarrabian egin osoko bilkuran UPNko zinegotzi Francisco Eransusen dimisioa ezagutzera eman zen ofizialki. Eta hura ordezkatu duen Jose Luis Medranok kargua har dezan tramiteak hasi ziren.